



閩／懷想／☆☆☆★

原諒

今仔日一透早，趕緊欲赴人臨時共我討的資料，拍開電腦接著網路，隨看著一條予我目箍紅的新聞：三歲囡仔暈醒揣無爸母，對九樓墜樓死亡。

千算萬算，毋值天一劃。這個查某囡仔個阿爸七點就出門趕欲坐飛行機去國外出張，個阿母按算囡仔閣暈甲誠落眠無遐快(khuài)醒，想講近仔隨轉來，佇七點廿五分，先送大後生去學校讀冊，差不多七點四十分，三歲的查某囡暈醒揣無人，踏起去客廳的窗仔門對大樓樓跤金金相，無細膩跋落一樓。做老母的一下轉來，看著惜命命的查某囡規身軀全血，軟菼菼袂振袂動，大聲吼、大聲喝：「哪會按呢？哪會按呢？」幼囡仔對九樓摔落地，送去病院嘛無效去矣。七十幾歲的阿公阿媽聽著這個歹消息，緊趕去病院，阿媽跪佇塗跤一直唸「阿彌陀佛」，阿公行來行去，罵新婦「囡仔是按怎恁的」，囡仔的老母守佇屍體邊仔，毋願離跤步，那流目屎、那叫囡仔的名、那唸「是我無注意、是我無注意」、「失禮、失禮」，哭甲傷(siunn)傷心昏昏去，囡仔的老爸緊對機場幹倒轉來，毋敢相信講代誌會按呢來發生，兩個翁仔某摺咧一直吼、一直吼。

我想著阮表姊，三十冬前，伊厝裡開做餅工場，細漢後生暈晝精神，全款是揣無阿母，對樓梯跋落來，擗著頭殼曲去，到今，阮表姊便若 講著就目屎流、目屎滴。咱是外人，看囡仔按呢定著會毋甘、會心酸，對做老母的來講，煞是心中永遠的疼。怪啥人攏無妥當，正常的老母，無人會刁工欲共囡仔恁甲曲去、無去。現代的女性，一個人做幾若個人用，誠辛苦，毋免別人來責備，這個老母絕對會一世人怪家己，因為原諒別人較簡單，原諒家己有較難。

天頂的囡仔啊.....恁敢有了解做老母的疼，敢會當原諒恁阿母咧？

作者：王秀容

☆詞彙學習☆

【出張】tshut-tiunn：出差

【軟菼菼】nng-siô-siô：軟趴趴

【落眠】lòh-bîn：熟睡、沉睡

【無效去矣】bô-hâu-khì-ah：回天乏術

☆文法學習☆

【.....起去】：動詞+「起去」，意為「.....上去」，例如「行起去」是走上去、「提起去」是拿上去。在這個句式中，動詞要讀本調，「起去」兩字皆讀輕聲，而「去」字常已虛化為「lih」音，聽不出原本的kh聲母了。